


Crappa e saissa

Crap ei ozildi il plaid dominont per la caussa corrispudenta egl entir Grischun romontsch. Quei plaid ei d'origin pre-roman. 15 a. Cr. han ils Romans acquistau la Rezia. Dalla reuniu dil ni dils lungatgs plidai lu en Rezia cul latin vulgar ei il romontsch sortius. Crap ei pia in da quels plaids romontschs ch'ha surviviu l'invasiun dils Romans e da lur lungatg, il latin vulgar, e viva aunc oz frestgs e viscals el romontsch. Ils Romans vevan denton era crappa e se capescha era plaids persuenter. PÉTRA e SÁXUM eran lur plaids per «crap, grep». Pia ein quellas expressiuns era penetradas culs invasurs romans en Rezia. Leu vevan ins aschia tuttenina treis plaids per la medema caussa.

Co stat quei ozildi? Igl engiadines modern ha per «crap» era il plaid *peidra*, occasionalmein legian ni audan ins plinavon *sass*. Ils idioms surmiran, sutsilvan e sursilvan han sco igl engiadines il plaid *pedra*, denton mo culla muntada specificada «juvel». *Crap* ha pia teniu sia posizion dominonta e pudiu resister allas «attaccas» dil latin vulgar. Ch'il romontsch vegl veva denton tuts treis plaids en discussiun, pia *crap, peidra/pedra e sass*, e che quels ston ver giu diras lutgas per mirar tgi che damog-

ni, cumprovan numbs locals. Leu ein ils derivats dils plaids latins PÉTRA e SÁXUM numnadamein representai fetg bein. PÉTRA viva p. ex. els numbs *Pedra* (Vignogn), *Peidra* (Zernez), *Piadoras* (Rueun) e *Pedras* (Tschlin), plinavon els derivats *Peidrettas* (Ftan), *Padrus* (Cumbel) e *Padrausa* (Crusch/Grüschi). SÁXUM ei sesviluppaus egl engiadines, sco gia viu, a *sass*, el surmiran e sutsilvan a *sas* ed el sursilvan a *sais*. Las fuormas collectivas leutier ein *sassa, sessa e saissa* (pareglia il latin plural SÁXA). Nums locals che derivan da SÁXUM/SÁXA ein p.ex. *Sais* (Schlans), *Zais* (Vuorz), *Zes* (Ziraun), *Ses* (Casti) e *Sassa* (Ardez). La fuorma collectiva dil sursilvan vegl, *saissa*, viva el num beinenconuscent *Sursaissa*, che vul pia dir «sur la greppa». Manegiada ei se capescha la spunda greppusa alla riva dretga dil Rein.

In num analog ei *Surses*, il num dil territori da Casti tochen sils pass dil Gelgia e dil Set. Ses sereferescha alla greppa denter Cunter e Casti. La greppa sper la Punt Russein denter Sumvitg e Mustér fuorma il cunfin denter la part su e la part sut dil cumin dalla Cadi. Ils numbs per las parts numnadas ein *Sursassiala* e *Sutsassiala*. La part *sassiala* dils dus numbs sereferescha al-



La Punt Russein, ca. 1865 (gravura da Th. v. Eckenbrecher, 1842–1921, ed A. Closs, 1840–1894).

la greppa numnada e deriva da SAXUM + -ÉLLA. Sur- e Sutsassiala munta pia «sur respectivamein sut la greppa (dalla Punt Russein)». Perdetga ch'il plaid latin SÁXUM ei penetraus el romontsch dat era in im-

posant cuolm grischun, il Schesaplana (2964 m s. m.), il pli ault cuolm dalla cadelina dil Reticon. Schesaplana deriva numnadamein da SAXA PLÁNA e munta pia «greppa planiva».